



# NEWSLETTER BR. 24

OKTOBAR 2016

## SADRŽAJ

### FIPA AKTIVNOSTI ≡

- » FIPA posjetila kompanije Lokum d.o.o. i Elin Motors Bosnia d.o.o.
- » Učešće FIPA-e na Balkan Business Forumu u Skoplju
- » Učešće FIPA-e na privrednoj konferenciji "Invest in Orašje"
- » Aftercare posjeta kompaniji Print-GS doo Travnik
- » Prezentacija investicijskih mogućnosti Bosne i Hercegovine u Jordanu
- » Predstavnik FIPA-e učestvovao na konferenciji o održivosti DSU
- » FIPA: Potpisan Memorandum o suradnji sa Banjalučkim Velesajmom
- » DONGFANG ELECTRIC CORPORATION LIMITED U FIPA-i
- » Unapređenje poslovne suradnje Bosne i Hercegovine i Japana
- » Predstavnici FIPA-e posjetili sajam Expo Real u Minhenu
- » Prezentacija FIPA-e na Poslovnom forumu Mađarska-Bosna i Hercegovina
- » FIPA: Katarski investitor zainteresiran za ulaganje u rudnike kamena i mermera u BiH

### POSLOVNE VIJESTI ≡

- » Delegacija japanskih privrednika posjetila BiH
- » RENEXPO BiH

# FIPA AKTIVNOSTI ≡



FIPA POSJETILA KOMPANIJE LOKUM D.O.O.  
I ELIN MOTORS BOSNIA D.O.O.



UČEŠĆE FIPA-E NA BALKAN BUSINESS  
FORUMU U SKOPLJU ≡



...I JOŠ FIPA AKTIVNOSTI...



## FIPA POSJETILA KOMPANIJE LOKUM D.O.O. I ELIN MOTORS BOSNIA D.O.O.



Predstavnici Agencije za unapređenje stranih investicija BiH (FIPA) i Općine Živinice su 20. oktobra 2016. godine u okviru Aftercare programa posjetili kompanije Lokum d.o.o. i Elin Motors Bosnia d.o.o. Kompanija Lokum se od 2016. godine bavi proizvodnjom kolača i predstavlja investiciju iz Republike Turske. Dosadašnji iznos investicije je 4 miliona KM, a zapošljava 25-30 radnika, u zavisnosti od potreba posla. Suvlasnik kompanije Mustafa Yavuz, se nakon uspešnog investiranja u kompaniju Yavuz, koja se bavi proizvodnjom aluminijske stolarije, odlučio na proširenje poslovanja u BiH. Po riječima g. Yavuz, kompanija Lokum izvozi svoje proizvode na tržište Njemačke, Austrije i Srbije. Zadovoljan je poslovnim ambijentom u BiH, ali je ubijeđen da bi pojednostavljenjem administrativnih procedura, broj investitora bio mnogo veći. Kompanija Elin Motoren GmbH iz Austrije je 2015. godine osnovala kompaniju Elin Motors Bosnia d.o.o., koja se bavi proizvodnjom elektromotora, generatora i transformatora, te zapošljava 180 radnika. Firma je prvobitno zapošljavala 40 radnika, ali je nakon dobrih rezultata poslovanja, broj zaposlenih povećan na 180. Od osnivanja do danas je uloženo 8 miliona KM u opremu i gradnju novih proizvodnih hala. Kompanija je reinvestirala 3 miliona KM u projekat koji će biti završen do proljeća 2017. godine. Kompletnu proizvodnju izvoze u Austriju za poznatog kupca.

Menadžer administracije Sandra Suljić i menadžer kontrole kvaliteta Adnan Halilagić su upoznali predstavnike Suradničke mreže za postinvesticionu podršku stranim investitorima u BiH o planovima proširenja proizvodnje, kao i poteškoćama sa kojima se suočavaju. Predstavnici navedene firme su istakli da imaju izuzetno dobru suradnju sa predstavnicima lokalne samouprave, ali smatraju da bi trebali imati veću podršku viših nivoa vlasti, te, da su procedure za uvoz hemikalija, koje su im potrebne za proizvodnju, previše komplicirane.



## UČEŠĆE FIPA-E NA BALKAN BUSINESS FORUMU U SKOPLJU



Nezavisna asocijacija privrednika MUSIAD iz Turske je organizirala 21. oktobra 2016. godine u Skoplju Balkan Business Forumu na kojem su učestvovala kompanije iz građevinskog, turističkog, poljoprivredno-prehrambenog, tekstilnog sektora i metalurgije. Šef Odsjeka za promociju investicija FIPA-e-i Nina Pobrić je tom prilikom održala prezentaciju o investicijskim potencijalima BiH. Upoznala je potencijalne turske investitore o osnovnim makroekonomskim pokazateljima u BiH, unapređenju poslovne klime, konkurentskim prednostima koje BiH nudi stranim investitorima i atraktivnim sektorima za ulaganje, poput metalo-prerađivačkog i elektro sektora, sektora auto-dijelova, energetike, turizma, prehrambene i tekstilne industrije. Tom prilikom je iskazan napredak BiH prema Doing Business izvještaju Svjetske banke za 2016. godinu, po kojem je BiH na 79. poziciji, što predstavlja snažan napredak u odnosu na 2014. godinu kada je BiH bila rangirana na 131. poziciji. Zatim su turski investitori upoznati sa porastom ekonomskih indikatora, reformskom agendom, prihvatanjem BiH aplikacije za članstvo u EU.

Pored predstavnika FIPA-e, govornici na Forumu su bili i predstavnici Turske, Makedonije, Srbije, Crne Gore, Rumunije, Albanije i Kosova.

Balkan Business Forum je organiziran povodom svečanog otvorenja MUSIAD ureda za regiju Balkana u Skoplju. MUSIAD je udruženje koje posluju u 66 zemalja, sa 169 centara širom svijeta. Cilj otvaranja ovog ureda je postizanje veće poslovne suradnje između Turske i zemalja Balkana.

Nakon Forumu, organizirani su B2B sastanci, kao i posjete nekim od postojećih turskih investicija u Makedoniji.



## UČEŠĆE FIPA-E NA PRIVREDNOJ KONFERENCIJI “INVEST IN ORAŠJE”



Zamjenik direktora Agencije za unapređenje stranih investicija BiH (FIPA) Blaženka Mišković učestvovala je na privrednoj konferenciji “Invest in Orašje” 21. oktobra, prezentirajući mogućnosti za ulaganje koje Bosna i Hercegovina nudi stranim investitorima. Također je upoznala prisutne o trenutnom stanju priliva stranih investicija u BiH, kao i o zakonskom okviru za strana ulaganja.

Konferencija je organizirana sa ciljem predstavljanja Općine Orašje kao potencijalne investicijske destinacije, te kako bi se istakao značaj i uloga podrške nadležnih institucija u kreiranju povoljnog poslovnog okruženja i razvoja malih i srednjih preduzeća.

Prezentirani su i uspješni primjer investicija koje posluju na ovom području.

Na konferenciji su učestvovali predstavnici Općine Orašje, FIPA-e, Ministarstva razvoja, poduzetništva i obrta FBiH, Privrednog centra Posavina, Agencije za razvoj preduzeća EDA iz Banja Luke, te lokalni privrednici.



## AFTERCARE POSJETA KOMPANIJ PRINT-GS DOO TRAVNIK



Predstavnici Agencije za unapređenje stranih investicija BiH (FIPA), Općine Travnik i Ministarstva privrede Srednjobosanskog kantona posjetili su 14. oktobra 2016. godine u okviru Aftercare programa kompaniju Print-GS doo Travnik. Kompanija Global Sourcing iz Njemačke koja je prije više od deset godina uspješno privatizirala Tvornicu mašina u Travniku, osnovala je novu kompaniju pod nazivom Print-GS. Štamparija Print-GS zapošljava 38 radnika i bavi se proizvodnjom raznih vrsta štampanih stvari poput kataloga, kartonske ambalaže, plakata, registratora, knjiga i sl. GS Tvornica mašina Travnik je u većinskom vlasništvu njemačke kompanije "Global sourcing - Agentur für Technische Erzeugnisse" GmbH iz Regensburga. Od privatizacije do danas uloženo je preko 10 miliona KM u popravke i gradnju novih proizvodnih hala kao i u nabavku opreme. Fabrika ukupno zapošljava 250 radnika i većinu proizvodnje izvoze u Njemačku. Direktor kompanije Print-GS gđin. Zoran Gazibarić, rukovodilac proizvodnje gđin. Željko Milovanović i gđin. Asim Hidić iz komercijalnog sektora upoznali su predstavnike Suradničke mreže za postinvesticionu podršku investitorima u BiH o planovima proširenja proizvodnje kao i poteškoćama sa kojima se suočavaju.

Kompaniji je potrebno zemljište za izgradnju nove poslovne hale od 3 000m<sup>2</sup>, te je na sastanku dogovorena koordinacija aktivnosti Općine Travnik, Srednjobosanskog kantona i FIPA-e u cilju iznalaženja najadekvatnijeg rješenja koji bi kompaniji omogućio nova ulaganja i proizvodnju. Iskazano je nazadovoljstvo novim Pravilnikom o izmjeni pravilnika o primjeni zakona o porezu na dohodak kojim je smanjen neoporezivi procenat za topli obrok na jedan posto prosječne plate u FBiH, kao i sa novim Zakonom o porezu na dobit kompanija, što će ostaviti velike posljedice kako na standard zaposlenika, tako i na buduće planove razvoja kompanije. Grafičke industrije u BiH iz godine u godinu ostvaruju bolje rezultate, ali zbog proizvoda s većom dodatnom vrijednosti, predstavnici kompanije Print GS smatraju da ova industrija treba veću podršku svih nivoa vlasti i usklađenost obrazovnog sektora kako bi mladi educirani kadar pratio tehnološke i dizajnerske trendove.



## PREZENTACIJA INVESTICIJSKIH MOGUĆNOSTI BOSNE I HERCEGOVINE U JORDANU



U okviru zvanične posjete ministra vanjske trgovine i ekonomskih odnosa BiH Mirka Šarovića 16. i 17. oktobra 2016. godine Hašemitskoj Kraljivini Jordan, održana je poslovna konferencija, na kojoj je pomoćnik direktora Agencije FIPA doc.dr. Maida Bećirović, održala prezentaciju o investicijskim potencijalima Bosne i Hercegovine.

Ovom prilikom istaknute su prednosti ulaganja u Bosnu i Hercegovinu, te predstavljeni sektori i konkretni projekti spremni za ulaganja.

Tokom konferencije održano je više bilateralnih susreta sa predstavnicima privrednika iz Jordana i drugih zemalja regiona, koji su iskazali interes za ulaganja, prije svega u poljoprivredni sektor, farmaceutski i tekstilni sektor, te turizam i građevinarstvo.



## PREDSTAVNIK FIPA-E UČESTVOVAO NA KONFERENCIJI O ODRŽIVOSTI DSU



Zamjenik direktora Agencije za unapređenje stranih investicija BiH (FIPA) Blaženka Mišković učestvovala je na 21. godišnjoj konferenciji WAIPA-e posvećenoj održivosti direktnih stranih ulaganja, koja je održana 13. i 14. oktobra u Istanbulu.

Konferencija je okupila predstavnike Agencija za strana ulaganja iz velikog broja zemalja svijeta, predstavnike vlada, privatnog sektora, kao i akademske zajednice koji se bave politikama o direktnim stranim ulaganjima.

Ovom prilikom je gđa Mišković govorila o Aftercare programu (postinvesticiona podrška stranim investitorima koji posluju u BiH) kojeg FIPA provodi od 2007. godine, i Suradničkoj mreži koja je formirana 2013. godine sa ciljem uključivanja svih nivoa vlasti u BiH u zajedničko rješavanje administrativnih problema sa kojima se suočavaju strani investitori u zemlji.





## FIPA: POTPISAN MEMORANDUM O SURADNJI SA BANJALUČKIM VELESAJMOM



Direktor Agencije za unapređenje stranih investicija BiH (FIPA) Gordan Milinić i Predsjednik Upravnog odbora Banjalučkog Velesajma Dobrica Žugić potpisali su 13. oktobra 2016. godine u Banja Luci Memorandum o suradnji koji se odnosi na zajedničke aktivnosti prilikom organiziranja određenih sajamskih manifestacija.

Potpisnici ovog Memoranduma će, u skladu sa svojim nadležnostima, učestvovati u realizaciji aktivnosti vezanih za 20. Međunarodni sajam poljoprivrede i prehrambene industrije "AGROS 2016", sajam lova, ribolova, ekologije i sporta "LORIMES 2016" i sajam turizma i ugostiteljstva, objedinjenih pod nazivom „Jesenji sajam 2016“ u organizaciji Banjalučkog Velesajma. FIPA i Banjalučki Velesajam će surađivati na promoviranju sajmova, kao i upućivanju poziva firmama za učešće, bilo kao izlagač ili posjetilac, te na privlačenju što većeg broja stranih i domaćih investitora da posjete sajamske manifestacije.

Radit će zajednički na informiranju ciljnih grupa o održavanju sajamskih manifestacija putem web sajtova, kao i kroz druge vidove komunikacijskih alata.



## DONGFANG ELECTRIC CORPORATION LIMITED U FIPA-I



Direktor Agencije za unapređenje stranih investicija BiH (FIPA) Gordan Milinić razgovarao je sa Zhang Yijunom, direktorom Ureda kineske kompanije Dongfang Electric Corporation Limited u Beogradu, o trenutno raspoloživim projektima iz energetike sa fokusom na projekte termoelektrana poput Bugojna, Kaknja, Kongore, Miljevine za koje je iskazan poseban interes. Investitoru su također predstavljani i projekti vjetroenergije u BiH.

Dongfang Electric Corporation Limited trenutno realizira energetske projekte u vrijednosti od 21 milijardu dolara u različitim zemljama u svijetu, a bio je angažiran i na izgradnji termoelektrane Stanari. Do sada su realizirali 100 projekata u 30 zemalja svijeta.

FIPA će zainteresiranom investitoru pružiti svu potrebnu pomoć, kao i informacije vezano za navedene projekte, te će organizirati sastanke sa vlasnicima projekata i investitorom radi bržeg uspostavljanja kontakata i započinjanja razgovora o mogućnostima suradnje.



## UNAPREĐENJE POSLOVNE SURADNJE BOSNE I HERCEGOVINE I JAPANA



Vanjskotrgovinska komora Bosne i Hercegovine, u suradnji sa Japanskom vanjskotrgovinskom organizacijom (JETRO) iz Beča, Ambasadom Japana u Bosni i Hercegovini i Agencijom za unapređenje stranih investicija u Bosni i Hercegovini, organizirala je posjetu japanske poslovne delegacije Bosni i Hercegovini, inače prvu posjetu poslovne delegacije iz Japana BiH, otkad su uspostavljeni diplomatski odnosi između dvije zemlje.

Prvi dan posjete, 6. oktobra 2016. godine, u prostorijama Komore organiziran je seminar i prezentacije o privrednim i investicionim prilikama za japanske privrednike.

Privrednicima iz Japana, predstavnicima 13 japanskih kompanija, obratili su se doc. dr. sc. Bruno Bojić, predsjednik Vanjskotrgovinske komore BiH, Blaženka Mišković, zamjenik direktora Agencije za unapređenje stranih investicija u BiH (FIPA), Nj. E. Kazuya OGAWA, ambasador Japana u BiH i g. Satoshi Abe, generalni direktor JETRO WIEN.

Tokom obraćanja je istaknuto da Bosna i Hercegovina ima mnogo potencijala, kako u pogledu energetskog i prerađivačkog sektora, tako i u poljoprivredi, metalnom sektoru, građevinarstvu i turizmu, te da bi trebalo poraditi na povećanju priliva japanskih investicija u BiH, ali i povećanju vanjskotrgovinske razmjene između Bosne i Hercegovine i Japana, čiji je obim u 2015. godini iznosio oko 10 miliona eura.

S obzirom da je Japan jedan od najvećih donatora u našoj zemlji, predsjednik Bojić je iskoristio priliku i zahvalio se Japanu na pomoći koju su pružili BiH, te istakao da će se danas razgovarati o biznisu, o tome šta BiH može ponuditi Japanu i obratno, te koje su to oblasti gdje se može sarađivati. U okviru seminara predstavnik FIPA-e Nina Pabrić održala je prezentaciju o poslovnom okruženju i investicionim prilikama u Bosni i Hercegovini, kao i predstavnik Vijeća stranih investitora BiH. Održana je i panel diskusija, na kojoj su strani investitori u BiH iznijeli svoja iskustva poslovanja u našoj zemlji.



## PREDSTAVNICI FIPA-E POSJETILI SAJAM EXPO REAL U MINHENU



Delegacija Agencije za unapređenje stranih investicija u BiH (FIPA) na čelu sa direktorom Gordanom Milinićem posjetila je sajam Expo Real u Minhenu, koji se održava od 4. do 6. oktobra 2016. godine sa ciljem pronalaska potencijalnih stranih investitora koji bi mogli ulagati u Bosnu i Hercegovinu.

EXPO REAL je najveća manifestacija ove vrste u Europi, na kojoj preko 80% učesnika čine sami investitori i donosioci odluka. Sajam je idealna prilika za uspostavljanje kontakata i predstavljanje projekata potencijalnim investitorima, kao i upoznavanje sa najnovijim trendovima iz industrije. Na sajmu, koji je okupio preko 1.700 izlagača i preko 36.000 posjetilaca širom svijeta, predstavnici FIPA-e kroz sastanke sa stranim kompanijama, predstavljaju mogućnosti za investiranje u BiH.

Sajam EXPO REAL je najveći B2B sajam za nekretnine i poslovne investicije u Europi, te kao takav pruža najbolje uslove za uspostavljanje poslovnih kontakata sa predstavnicima iz svih područja poslovanja i investiranja, od razvoja, finansiranja projekata, pa do realizacije projekata.

Predstavnici FIPA-e su ostvarili brojne kontakte sa potencijalnim investitorima koji su poseban interes pokazali za izgradnju i rekonstrukciju turističkih kapaciteta u Bosni i Hercegovini, sa akcentom na hotele i banje.

Bosnu i Hercegovinu je u prvih šest mjeseci 2016. godine posjetilo oko 500 000 turista, što je za 8 % više u odnosu na isti period prošle godine. Ostvareno je oko million noćenja, što je povećanje od 6.9 % u odnosu na prva dva kvartala 2015. godine. Konstantan rast broja turista u našoj zemlji, ukazuje na potrebu širenja i razvoja turističkih i smještajnih kapaciteta.



## PREZENTACIJA FIPA-E NA POSLOVNOM FORUMU MAĐARSKA-BOSNA I HERCEGOVINA



Vanjskotrgovinska komora BiH u suradnji sa Privrednom komorom Mađarske, organizirala je 3. oktobra 2016. godine u Sarajevu Poslovni forum Mađarska-Bosna i Hercegovina, na kojem su učestvovala kompanije iz Mađarske iz prehrambenog, metalo-prerađivačkog, ICT, i drvo-prerađivačkog sektora.

Tom prilikom Nina Pobrić, šef Odsjeka za promociju investicija u FIPA-i, je održala prezentaciju o komparativnim prednostima i investicijskim potencijalima Bosne i Hercegovine. Istaknula je da postoje brojne činjenice koje govore u prilog tome kako je Bosna i Hercegovina zemlja poželjna za ulaganje. To su: dobar geo-strateški položaj, nacionalni tretman za strane investitore, kvalitetni prirodni resursi, educirana i cjenovno-konkurentna radna snaga, razvijen bankarski sektor i stabilna valuta, niska stopa poreza, brojni ugovori o slobodnoj i preferencijalnoj trgovini, niski operativni troškovi, atraktivne green-field i brown-field investicijske lokacije, te atraktivni projekti u sektoru energetike, metalo-prerade, drvne i tekstilne industrije, vrlo ozbiljni poljoprivredni kapaciteti za proizvodnju zdrave hrane kao i veliki potencijali u sektoru turizma.



## FIPA: KATARSKI INVESTITOR ZAINTERESIRAN ZA ULAGANJE U RUDNIKE KAMENA I MERMERA U BIH



Direktor Agencije za unapređenje stranih investicija BiH (FIPA) Gordan Milinić i suradnici informirali su katarskog investitora Nerton Investments o mogućnostima za ulaganje u rudnike kamena, bankarski sektor i sektor nekretnina u BiH za koje su prethodno iskazali interes.

Tokom današnjeg sastanka uspostavljen je kontakt sa nosiocima nekoliko investicijskih projekata, te su organizirani sastanci ovim povodom.

Investitor je spreman odmah krenuti sa realizacijom investicije ukoliko pronađe adekvatan investicijski projekat u BiH.

# POSLOVNE VIJESTI ≡



DELEGACIJA JAPANSKIH PRIVREDNIKA POSJETILA BIH



RENEXPO BIH



...I JOŠ FIPA POSLOVNIH VIJESTI...



## DELEGACIJA JAPANSKIH PRIVREDNIKA POSJETILA BiH

U organizaciji Agencije za unapređenje stranih ulaganja BiH (FIPA), Vanjskotrgovinske komore BiH, Japanske vanjskotrgovinske organizacije (JETRO) iz Beča i ambasade Japana u BiH, privredna delegacija 13 japanskih firmi posjetili su BiH kako bi se upoznali sa privrednim mogućnostima naše zemlje i kako bi dobili informacije o poslovnom okruženju BiH.

Predstavnik japanske poslovne delegacije Satoshi Abe je ovom prilikom izjavio da će Japanci u budućnosti mnogo više surađivati s BiH zbog prednosti kao što su: nizak porez na profit, lak pristup tržištima Europske unije i niski troškovi radne snage. U delegaciji je bio i generalni direktor Mitsubishi ureda u Beogradu Naoki Tsukada, koji je došao da vidi postoji li mogućnost uspostavljanja ureda u BiH i poslovnih odnosa. Kazao je da želi suradnju, ali da se prvo mora informirati o političkom i ekonomskom ambijentu i administrativnom sistemu BiH.

U susretu sa japanskim privrednicima, direktor ArcelorMittala iz Zenice, koji je u BiH od 2004. godine, Biju Nair, istakao je da je bh. tržište provjereno i da je uspjeh zagarantiran. Naglasio je da je kvalitetna radna snaga, samo jedna od prednosti poslovanja u BiH.

“Mi širimo naš posao otkada smo došli u BiH, proizvode plasiramo u oko 20 država”.





RENEXPO BIH

3. međunarodni sajam i konferencija o obnovljivim izvorima energije, energetske efikasnosti i okolišu u Bosni i Hercegovini – RENEXPO BiH će se održati 9. i 10. novembra u hotelu Hills, Sarajevo.

Na ovogodišnjem događaju, stranim izlagačima i potencijalnim investitorima bit će predstavljeno više od 100 projekata iz oblasti vjetroenergije, hidroenergije, fotonapona, biomase, biogasa, energetske efikasnosti, otpada itd. Predstavnik FIPA-e će ovom prilikom predstaviti trenutno raspoložive investicijske projekte koji se odnose na obnovljive izvore energije.



## MISIJA FIPA-E

Agencija za unapređenje stranih investicija Bosne i Hercegovine je agencija koju je osnovalo Vijeće ministara Bosne i Hercegovine, a čija je osnovna zadaća :

- Privlačenje i povećanje priliva stranih investicija u Bosnu i Hercegovinu i poticanje postojećih investitora u zemlji na dalja ulaganja i širenje poslovanja
- Poboljšanje saradnje između privatnog i javnog sektora, predlaganje mjera za unapređenje okruženja za investiranje, a s time i ekonomskog razvoja
- Predstavljanje Bosne i Hercegovine kao zemlje poželjne za strane investitore



## USLUGE FIPA-E

Vijeće ministara Bosne i Hercegovine je zadužilo Agenciju za unapređenje stranih investicija da pruži podršku direktnim stranim investicijama i da olakša priliv stranih ulaganja u našoj zemlji. Agencija saraduje s institucijama vlasti i investitorima, te pomaže nadležnim vlastima da poboljšaju zakonski okvir za strana ulaganja. FIPA takođe pomaže investitorima da uspostave kontakte s javnim i privatnim sektorima BiH. Pokazatelji koji se odnose na priliv investicija, uspostava kontakata i studije privrednih sektora koje su izradili FIPA stručnjaci i nezavisni konsultanti, omogućavaju da investitori budu u potpunosti informirani o investicijskim mogućnostima koje Bosna i Hercegovina trenutno nudi. Osim toga, FIPA usko saraduje i sa ambasadama i diplomatskim predstavništvima Bosne i Hercegovine, koji takođe mogu pomoći investitorima da istraže mogućnosti ulaganja u našoj zemlji.

FIPA pruža informacije, analize i savjete potencijalnim investitorima o poslovnom i investicijskom okruženju, uključujući:

- zakonodavstvo koje se odnosi na direktna strana ulaganja
- podsticaje koji se odnose na ulaganja
- ekonomska i poslovna kretanja u zemlji

FIPA identificira i predstavlja postojeće bh. mogućnosti za strana ulaganja :

- investicijske projekte u fazi razvoja ili projekte koji su već spremni za realizaciju
- preduzeća u procesu privatizacije
- domaće firme koje traže stranog poslovnog partnera

FIPA pruža pomoć potencijalnim investitorima i onima koji su već investirali u zemlji kroz :

- saradnju s javnim i privatnim sektorom
- saradnju s vladinim i nevladinim institucijama kako bi se olakšao privredni razvoj
- saradnju s lokalnim, regionalnim i međunarodnim organizacijama kako bi se poboljšalo okruženje za ulaganja



DA BISTE SAZNALI VIŠE O USLUGAMA FIPA-E,  
KOJE SU BESPLATNE, KONTAKTIRAJTE NAS  
DIREKTNO.

Grbavička 4  
71000 Sarajevo  
Tel: +387 22 278 080  
Fax: + 387 33 278 081  
e-mail : [fipa@fipa.gov.ba](mailto:fipa@fipa.gov.ba)  
[www.fipa.gov.ba](http://www.fipa.gov.ba)

Ured FIPA-e Mostar  
Kneza Višeslava, Office 54  
88000 Mostar  
Tel/Fax: +387 36 558 815  
E-mail: [mostar@fipa.gov.ba](mailto:mostar@fipa.gov.ba)

Ured FIPA-e Banja Luka  
Jovana Surutke 13/III  
78000 Banja Luka  
Tel/Fax: + 387 51 226 180  
E-mail: [banjaluka@fipa.gov.ba](mailto:banjaluka@fipa.gov.ba)

A map of Europe with white outlines of countries on a blue background. The country of Bosnia and Herzegovina is highlighted with a yellow and blue flag featuring white stars. The text is centered over the map.

# INVEST IN BOSNIA AND HERZEGOVINA YOUR NEW OPPORTUNITY

[WWW.FIPA.GOV.BA](http://WWW.FIPA.GOV.BA)